



REPUBLIKA E SHQIPËRISË

KUVENDI
Komisioni për Sigurinë Kombëtare

Tiranë më 23.10.2018
Dokument parlamentar

R A P O R T

Mbi Projektligjin “Për ratifikimin e marrëveshjes ndërmjet Këshillit të Ministrave të Republikës së Shqipërisë dhe qeverisë së Malit të Zi për hapjen e pikës së përbashkët të kalimit kufitar Zogaj (Republika e Shqipërisë) – Skje (Mali i Zi) për qarkullimin ndërkombëtar rrugor dhe të pasagjerëve në Liqenin e Shkodrës”

Drejtuar: *Seancës Plenare*

Komisioni për Sigurinë Kombëtare në cilësinë e komisionit për dhënie mendimi, bazuar në nenet 32-36 të Rregullores së Kuvendit, në mbledhjen e datës 22.10.2018, miratoi në parim, nen për nen dhe në tërësi, projektligjin “Për ratifikimin e marrëveshjes ndërmjet Këshillit të Ministrave të Republikës së Shqipërisë dhe qeverisë së Malit të Zi për hapjen e pikës së përbashkët të kalimit kufitar Zogaj (Republika e Shqipërisë) – Skje (Mali i Zi) për qarkullimin ndërkombëtar rrugor dhe të pasagjerëve në Liqenin e Shkodrës”

Për shqyrtimin e këtij projektligji u caktua relator deputeti Luan Harusha.

I - QËLLIMI I PROJEKT – AKTIT DHE OBJEKTIVAT QË SYNOHEN TË ARRIHEN:

Ky projektligj ka për qëllim ratifikimin e marrëveshjes, ndërmjet Këshillit të Ministrave të Republikës së Shqipërisë dhe qeverisë së Malit të Zi, për hapjen e pikës së përbashkët të kalimit kufitar Zogaj (Republika e Shqipërisë) – Skje (Mali i Zi) për qarkullimin ndërkombëtar rrugor dhe të pasagjerëve në liqenin e Shkodrës.

Marrëveshja është iniciuar në kuadër të forcimit të bashkëpunimit midis dy shteteve dhe për të krijuar kushte sa më të mira për zhvillimin e mëtejshëm të këtij bashkëpunimi, në kuadër të lehtësimit të qarkullimit në pikën e përbashkët kufitare, duke marrë masa të përbashkëta.

Palët, me hapjen e kësaj pike të përbashkët të kalimit kufitar, synojnë të realizojnë objektivat e tyre lidhur me lehtësimin e lëvizjes së lirë të shtetasve dhe të mjeteve në zonat afër Bashkisë Shkodër dhe zonave të malësisë së Krajës, komuna e Tivarit - Mali i Zi, në kufirin tokësor dhe liqenor me Malin e Zi.

Marrëveshja është miratuar në parim me vendimin nr.397, datë 2.7.2018, të Këshillit të Ministrave, dhe është nënshkruar nga palët.

Përparësitë që priten nga zbatimi i kësaj marrëveshjeje lidhen me lehtësimin e lëvizjes së banorëve të zonave afër Bashkisë së Shkodrës dhe zonave të Malësisë së Krajës, komuna e Tivarit - Mali i Zi, në të dyja anët e kufirit, shkurtimin e distancës, kontrollin më të mirë të sektorit të kufirit në zonën e Zogajt dhe veçanërisht kontrollin e bregut të liqenit të Shkodrës, si dhe shfrytëzimin e vlerave turistike të liqenit të Shkodrës dhe traditat e banorëve të Malësisë së Tivarit.

Kostot financiare të parashikuara në marrëveshje do të përballohen nga programi buxhetor “Policia e Shtetit”.

II. PËRMBLEDHJE SHPJEGUESE E PËRMBAJTJES SË PROJEKTAKTIT

Projektligji parashikon ratifikimin e marrëveshjes.

Në nenin 1 të marrëveshjes është parashikuar se qarkullimi i personave dhe i mallrave do të bëhet në kufirin shtetëror të Republikës së Shqipërisë dhe të Malit të Zi, ku lejohen vetëm kalime kufitare për qarkullim ndërkombëtar ose vende tjera të caktuara në marrëveshje ndërmjet palëve kontraktuese dhe se do të merren masat e duhura për ushtrimin e kontrollit në kuadër të mbylljes të të gjitha vendeve, të cilat nuk i përfshin si pika të ligjshme të kalimit kufitar. Palët caktojnë pikën e kalimit të përbashkët kufitar për qarkullim ndërkombëtar dhe qarkullim të personave në liqenin e Shkodrës, Zogaj (Republika e Shqipërisë) – Skje (Mal i Zi), e cila do të ndërtohet në territorin malazez, në vendin e quajtur Ckla, në aksin rrugor Ostros – Shirokë - Shkodër.

Parametrat teknikë përcaktohen nga komisioni i përbashkët, i cili do të fillojë të funksionojë pas përmbylljes së kushteve për funksionimin e rregullt ndërmjet shërbimeve kufitare të të dyja palëve.

Pika e përbashkët e kalimit kufitar do të jetë e hapur 24 orë në ditë për qarkullim ndërkombëtar rrugor dhe qarkullim të personave në liqenin e Shkodrës.

Palët me anë të kësaj marrëveshjeje bien dakord se do të nënshkruajnë protokollin ku do të detajohen procedurat për zbatimin e kontrollit të përbashkët kufitar, çështjet teknike dhe financiare për ndërtimin dhe funksionimin e pikës së përbashkët të kalimit kufitar.

Mbikëqyrja e zbatimit të kësaj marrëveshjeje do të kryhet nga Komisioni i Përbashkët i Ekspertëve, i themeluar në bazë të ligjit nr.9702, datë 2.4.2007, “Për ratifikimin e marrëveshjes ndërmjet Këshillit të Ministrave të Republikës së Shqipërisë dhe qeverisë së Republikës së Malit të Zi për hapjen e pikës së përbashkët kufitare Muriqan-Sukobin.

Komisioni, gjatë punës së tij, mund të përfshijë ekspertë të fushave të tjera dhe do të angazhohet në:

- a) përcjelljen dhe analizimin e zbatimit të marrëveshjes;
- b) përcjelljen dhe analizimin e frekuentimit të kalimeve kufitare, si dhe propozimin e masave dhe të veprimeve të duhura për përshpejtimin e qarkullimit të pasagjerëve e të mallrave;
- c) shqyrtimin dhe zgjidhjen e të gjitha çështjeve të rëndësishme gjatë zbatimit të marrëveshjes;
- ç) dhënien e propozimeve organeve kompetente të palëve kontraktuese, plotësime, si dhe marrjen e masave për përmirësimin e kushteve për zbatimin e marrëveshjes.

Pajisjet dhe mjetet transportuese të nevojshme për punë në pikën e përbashkët të kalimit kufitar janë të përjashtuara me ligj nga detyrimet doganore.

Marrëveshja është lidhur për një periudhë të pacaktuar kohore dhe secila palë mund ta zgjidhë marrëveshjen me shkresë diplomatike. Në këtë rast, kjo marrëveshje do të pushojë së aplikuari gjashtë muaj pas datës në të cilën pala tjetër ka marrë njoftimin për zgjidhjen.

Marrëveshja do të hyjë në fuqi në datën e marrjes së njoftimit të fundit me shkrim me anë të kanaleve diplomatike, ku palët njoftojnë njëra-tjetrën për përfundimin e procedurave të brendshme ligjore të nevojshme për hyrjen e saj në fuqi.

III - PËRFUNDIME

Komisioni për Sigurinë Kombëtare, në përfundim të shqyrtimit të projektligjit “Për ratifikimin e marrëveshjes ndërmjet Këshillit të Ministrave të Republikës së Shqipërisë dhe qeverisë së Malit të Zi për hapjen e pikës së përbashkët të kalimit kufitar Zogaj (Republika e Shqipërisë) – Skje (Mali i Zi) për qarkullimin ndërkombëtar rrugor dhe të pasagjerëve në Liqenin e Shkodrës” vlerësoi se:

Në aspektin procedural, projekt-ligji është paraqitur në përputhje me neni 121, të Kushtetutës, ligjin nr.43/2016, “Për marrëveshjet ndërkombëtare në Republikën e Shqipërisë”, si dhe Rregulloren e Kuvendit.

Në përfundim të diskutimeve, Komisioni për Sigurinë Kombëtare, duke vlerësuar rëndësinë e këtij projektligji, me shumicën e votave, miratoi projektligjin në parim, nen për nen dhe në tërësi duke ja kaluar për miratim seancës plenare.

Relator

Luan HARUSHA

Kryetare

Ermonela (FELAJ) VALIKAJ